

清人說齋二集

掃葉山房叢行

清人說書

卷之二

都門紀變百詠

青西復懷氏同著
村杞廬氏

馬路新開四達衢。太平時節帝王都。無端三月咸陽火。燒破塗山玉帛圖。

京城新築馬路自東交民巷迤邐至崇文門大街直達總署平坦可行無復從前崎嶇之象

初起山東號義民。忽延保定忽天津。俄驚輦下紛紛徧。真似神仙會駕雲。

團民起於山東直隸接壤之處延及保定天津今年三月間流入京師脅從益衆踪跡飄忽相傳有駕雲之術

洋氣須教一例除。先燒電線火輪車。琉璃河接長辛店。此是鵬程發軔初。

五月初一拳民肇事焚拆琉璃河長辛店一帶鐵路並毀電桿

使相巡行歷保陽。空名墨敕散千張。城鄉一夕標黃燄。奉旨團民字幾行。

五月十一日朝旨命剛相馳赴保定察看情形聞剛相沿途徧召渠豪散給空名劄子獎勵備至遂成招撫之議

頤和園裏鬧神仙。疑有疑無鼎沸傳。衛士倉皇宮監走。大家跪奏佛爺前。

皇太后皇上駐蹕頤和園五月十二夜二鼓後喧傳神仙下降附近居民爭購香楮向空跪拜喧嚷之聲達於大內翌日遂有回鑾之諭旋步軍統領等獲造言生事之人係李羣仔一名立即正法宮中稱太后為老佛爺

燒香供水喊連天。白混青皮一氣聯。嚇殺人家小兒女。紛紛羅拜大門前。

自五月十六日起每至夜分滿街喊聲大作令各家燒香供水其勢洶湧居民大懼

王府門前大燾高黃巾夾路怒提刀神仙符錄無憑準誤把京官當二毛

招撫議成諸王貝勒府第設立神壇門前高建大燾上書替天行道奉旨義和團等字樣有某京官携眷出都為團眾邏獲擁至莊王府燒香焚表僅而獲免團眾呼教民為二毛子

裊裊香烟卷禁城登壇焚表近神明滿朝紆紫拖青者低首齊呼大世兄
每壇有一大世兄領之壇事悉聽主持縉紳朝士詣壇跪禱往往相與抗行

閉目揮拳咒有靈洋人鎗礮喋無聲陣前只作婆婆舞殺敵原來不用兵

團眾到壇焚香一炷叩首三遍便即渾身發顫口中呼呼有聲少頃蹶然而起謂之上神閉目揮拳力大無敵事畢之後始焚表退神

八戒沙僧與悟空不教口角透微風東南三叩喃喃語瞥見封神姜太公

團眾念咒有八戒悟空不准透風及太公在此等語跪拜必向東南方

結束登場咒語同鐵眉鐵眼鐵肩胸羽林龍武虢如虎輸與香村五尺童

咒中又鉄眉鉄眼鉄肩胸等語鄉愚無知信從益眾雖鄉間五尺之童亦皆報名入團

包頭粗布色鮮紅怒目斷牙氣象雄素日蠢愚如鹿豕偶憑神力便威風

團眾皆用粗布包頭禁用洋布持械遊行氣餒可畏

黃乾紅坎滿城闔統率新增王大臣昔日八旗今八卦不妨名目略翻新

紫黃巾者為乾字團紫紅巾者為坎字團涇渭各分不相連屬五月二十六日朝旨命端莊二部及剛相督帶奉民

舉刀劃壁皎光青都道神仙敕勒靈一事真無思議處四圍焦土擁官廳

相傳團眾舉火之術劃壁作團中界十字形以刀連觸之呪着着着煞時烈錢飛騰矣十七夜焚燈市口教堂四圍俱燼獨留一巡街官廳上蓋涼棚亦未延及人皆異之

轆轤街頭碾水車神旗映出字龍蛇一瓢分解炎天渴都道壇中不飲茶

團眾以車運水上插黃旗有神奉水車字樣壇例不准飲茶惟飲涼水而已

不須轉饒更齋糧口袋新儲辟穀方却怪街坊太多事手持黃簿寫捐忙

聞團眾每人帶一口袋內儲辟穀丸日散兩三粒即能止飢自六月初旬起街坊無賴輩挨戶寫捐米麥銀錢隨意捐助然則所謂辟穀者特彼中愚人耳

尺方絳布挂門前道是仙壇敕令宣入夜紅燈齊照眼依稀萬壽太平年

團眾令居民鋪戶各于門首懸一紅布六月十四夜滿街多挂紅燈翌日又復傳令禁止

抹十愁兮改十歡玉皇把筆坐雲端由來天上人情重大帝猶將佛面看

團眾用黃紙刊送傳單言今年本月初有大劫因觀音大士慈悲眾生于玉皇前竭力面求遂將十愁改作十歡按十愁兵災凶荒等事十歡則天下太

平年穀豐登也

鍊氣三年導養勤。槍刀難入火難焚。自言術是金鈴子。不數奇門與易筋。

團中有功候較深者自言金鈴子術三年後始能不畏槍火

洪鈞老祖降從天。一日燕齊去復旋。宮錦袈裟月牙鏢。非僧非佛亦非仙。

團中所謹奉者曰洪鈞老祖五月十七日傍晚有人見一異人衣宮禁袈裟執月牙鉄鏢疾馳進永定門聞上午自山東起行申牌已抵燕京是夜遂有焚燒各教堂之事

青年高弟術通神。飛過黃河一葉身。三角黑旂兩丸彈。好憑法寶殺洋人。

傳聞有黃撓老祖者將生平奇術傳授高弟兩人各予黑旂一面鉄彈兩丸言開仗時黑旂一搖天昏地暗彈丸飛去便可盡殪敵人故團中奉為法寶

軍中有女氣難揚。天使神兵便不妨。寡婦嬌娃齊奮勇。紅燈挂後黑燈張。

團中有所謂紅燈照者均以十四五歲閨女充之衣履皆紅色相傳能避火砲黑燈照則皆青年嫠婦也

古貌銀髯二百秋。新來八老說甘州。自携五百田橫士。飛過重瀛蹴墨歐。

都中喧傳新來八老皆甘肅人年近二百白髯過腹望之若神仙中人係團中最老前輩自言將携五百團民航海西行徧擾歐美各洲地界

但願尋仇不願封。山東團首覲深宮。一龍二虎羊三百。隱語參詳七字中。

聞端邸引團首四人入覲太后面奏不願封官但願得一龍二虎三百羊俾了心願足矣七字隱語各有所指也

黃色肩輿力士扶。轅門投謁競傳呼。將軍揖客今重見。儀注翻新會典無。

聞天津圍首張德成等四人進謁裕制軍身坐黃色肩輿戰門武弁一律跪迎相見時長揖不拜氣餒頗薰灼

西方佛子大神通。統率兵團奏戰功。立馬陣前紅斗笠。隨身還有四金童。

傳言天津開仗時有老僧披紅斗笠四童子隨侍左右策馬先驅指揮兵團前進因獲勝仗

夫人統率復讐兵。來自齊州越禁城。粉黛兜鍪一佳話。白團三萬擁銀旌。

左提督寶貴陣亡於甲午牙山之役日來喧傳其夫人統率白團數萬人與洋人抵敵作復讐之舉

傳言寶坻大辛莊。拳法相師總姓黃。兄弟六人分領袖。麥花山下是家鄉。

寶坻縣東南鄉有大辛莊居民數十戶皆務農為業今年三月忽來拳師數人其領袖者自稱黃天霸兄弟六人皆住麥花山一鄉之人信奉甚謹

一般裝束兩般情。假假真真辨未明。放火殺人神不管。仙家亦是做聾盲。

自副都統慶恒全家被害後奉旨着將義和團分別真偽嚴加約束

虎詣邯鄲請鐵牌。深宮總為小民禱。窮鄉自有歸耕處。好雨聲中散爾儔。

都中苦旱已久王府丞培佑馳赴邯鄲縣恭請鐵牌六月初到京連日淫沛甘霖四鄉團眾有田可耕私自散歸者不少

聖祖當年用楚材。遠人恭順敢生猜。而今驅遣同羊豕。疑是晴天霹靂來。

康熙時南懷仁湯若望等以曆算術受知聖祖又居京師敕建天主堂于宣武門內城根二百年來奉教者日多而教民橫行之勢日甚今則奉旨驅逐矣

摩西十誡守真傳。駢首街衢命不延。到死猶呼天主護。可能呵護盡昇天。

團眾被殺教民極為慘酷聞教民臨死時尚有呼天主救我者其愚真不可及

天主堂高徧地燒。無如西什庫堅牢。訖言中有人皮陣。破法須將狗血漂。

京中教堂焚毀淨盡惟西什庫堅不能破砲火環攻殆無虛日宣傳堂中以人皮為陣故能辟除槍砲軍機某章京獻剋制之法言殺黑狗取血以噴筒遙射之可以立破

穢血塗門事有無。狐鳴篝火夜驚呼。可憐丐婦無名氏。到死猶疑作鬼奴。

五月十六日團民殺死某丐婦于草廠十條胡同言該婦受洋人賄託晚間以穢血塗人門戶將不利于居民

東倭書記德欽差。途遇無端白刃加。一蟻潰堤全局壞。重貽憂患到天家。

五月十五日殺日本書記生杉山彬于永定門外二十三日德國欽使克林德赴總署議事歸行至東長安街倉卒被賊

西兵矯健捷如猱。右手擎槍左執刀。銅帽蠻靴紅靸鞋。幾人扼死御河橋。

五月十五日西兵十五人兵官兩人扼守北御河橋團民不敢過

錫作彈丸布作囊。積沙四壁坐中央。如何不識軍謀狡。不見人兒只放槍。

洋兵佔住民房搜羅五金鎔作彈丸縫粗布為囊滿貯泥沙堆置牆壁間而相與藏躲其中吾軍歷亂放槍竟未能傷其一卒

蠻邸裁裁十一邦。半無牆壁半無窗。槍林礮雨相持苦。白旆曾無一卒降。

交民巷使館計有十一國兵團圍攻一月之久洋兵盡力抵禦不少退却○
西例投降則豎白旗

繞過楊村半日程一千精銳泰西兵赴援無計通前路陷入重圍不放行

西員續調救援使館之洋兵由天津入京行至楊村左近被團匪圍住不能
前進仍回天津

踰烏西匿陣雲開上將麾旌擁衆來可惜甘涼諸健卒枉將血肉委塵埃
董軍攻交民巷炮火轟天血肉狼藉甘涼精銳傷亡至二千餘人

使館沈沈鑿地營往來傳命屬章京雷池一步君休懼認取前途賜白旌

總署章京往來傳命均相見于地營之下其進退時以白旂為號

甕中捉鱉豈能逃公使全權氣斂消不信長房能縮地冥鴻海外已逍遙

軍機處接粵督從香港轉電言各國公使已有潛蹤出京者

不堪惡辱再圖存天語嗟咨國體尊率土人民齊下淚幾行明詔比興元

五月二十四日下宣戰諭旨有與其苟且圖存受人挾制何如大張撻伐一
決雌雄等語

捷書夜半到甘泉百萬優頒內府錢前敵兵民齊感奮溫綸賁自九重天

五月二十一日直督奏天津開仗奉民獲勝奉旨嘉獎賞銀四萬兩由天津
鹽庫給發○五月二十五日賞給武衛中軍甘軍神機虎神兩營及義和團
民各十萬兩由內帑頒發

徵調紛紛亂若麻。軍符四出捉官車。行人嗟嘆窮官樂。十日關門不上衙。

軍事日亟徵調紛如官兵四出捉車甚至大員所坐之紅柁呢車亦被捉去中城御史陳璧請飭大宛二縣設立官車局其事始定

龍旂飛颺大沽臺。礮火雷轟藥庫災。兵力未能當一面。兩三敵艇上塘來。

五月二十四日直督奏大沽失守情形東砲台為日本所佔西砲台為英兵所佔先一日專摺奏報有大沽兵力太單聞藥庫失火自焚恐難堅守然則彼時已有失守消息何摺中猶未明言耶

靴刀首怕出京門。健將如飛馬玉崑。行近大沽三百里。可能奪得舊營屯。

五月二十五日諭馬玉崑迅速回津助戰二十七日到京召見諭馳赴天津救援即日率兵出都其時已聞天津失守矣

津沽南北漲沙龍。千里烟台一綫通。鐵甲魚雷齊擁住。回颿難鼓巨鰲風。

喧傳大沽烟台海中同時漲兩沙龍將洋艦盡行擁住不能進退

趕造檣槍與背槍。軍書火急匠工忙。舊傳利器稱無敵。洋式翻嫌仿後膛。

諭豫撫裕長趕造抬槍背槍迅速解赴前敵

守城專屬大金吾。啟閉重門驗虎符。白塔安排傳信礮。誤公校尉敢枝梧。

諭步軍統領豫備守城事宜管理白塔信砲之某校尉因誤公獲譴

大官廷議面團團。一字言和便漢奸。且莫當前爭意氣。可知收拾劫棋難。

五月二十二、二十三、二十四三日召內閣六部九卿會議國事內閣學士聯元奏言不可輕於開霽端邸廷叱之幾遭不測

電召疆臣李合肥綸音重疊出軍機要他水陸兼程進一柱擎天合仗伊

五月二十日奉上諭粵督李鴻章着即來京六月初七電催迅速來京初十日又奉水陸兼程迅速來京之諭

奉詔勤王首着鞭錚錚佼佼定興賢如何忽作偷安計不賦同仇但議遷

召蘇撫鹿傳霖迅速來京聞鹿中丞有信函致榮剛二相國力主遷都之議

膺狄懲荆李海城忽持和議衆人驚老臣自解忠君國不是窮嫠節不負

李鑑堂欽使素惡洋人為團衆所信服近在長江一帶發來電奏亦持和議都人士譁然謂之改節

強弱相懸釁漫生諸臣痛哭上書爭錯疑湖北唐藩鎮中葉朝廷令不行

宣戰旨下東南督撫疑係矯詔均不遵行旋聯元抗章力諫亦未邀俞允

巨艦飛來瞬息中未從江海鼓腥風全虧諸老能調護半壁東南保障功

沿江沿海安堵如故皆張劉二制軍調護之力

羽檄飛馳召將才曾無外省一兵來老成全力持和議恐把生靈付劫灰

電催各省勤王兵一月以來尚未有一軍報到各督撫不遽調遣者猶望覺端速拜與各國言歸于好也

北門鎖鑰寇萊公幕府英才一夕空夜草軍書朝視事兩旬三疏太匆匆

直督裕制軍幕客聞變星散奏報太希奉旨申飭

兀兀金湯山海關將軍猿臂月弧彎朝廷自重千城寄莫把嚴疆看等閒

六月初二日諭增祺派兵嚴防山海關

乍聞三晉釁端開又見遼陽釀禍胎惟有山東袁撫院清風千里淨塵埃

六月初十日晉撫毓賢奏山西民教仇殺同日盛京禮部侍郎清銳奏拳民焚毀奉天所屬教堂惟山東則安堵如故

聯英聯日又聯俄電旨飛傳一刹那為問國書呈遞日使臣能否力調和

六月初七日電諭出使英日俄三國使臣向外部呈遞國書言議和事

窄窄衣襟短短槍少年內監易戎裝分班西苑門前立擁衛慈輿出上陽

皇太后選少年內監數百人手持新式快槍衣服整潔慈輿出入前後擁護

肘腋何堪有寇氛中涓逃避忽紛紛禁中大索威如虎龍準王孫將北軍

端邸疑皇上左右有崇奉天主教者帶領團民數百人入宮中搜查內監紛

覬覬肅邸富收藏劫火銷為瓦礫場骨董圖書盡拋却窖金千萬賸空坑

肅親王府鄰近英國使館珍藏金石書畫古帙為都下首屈一指富聲甲諸皇族今為洋兵所佔付之一炬

當朝老道住洋場愛惜門前土一方第宅園亭無片瓦中堂還是舊中堂

某中堂素有老道之稱其宅在東交民巷門前有土一堆阻碍馬路洋人以重價購之堅不允許云此係吾家風水所關豈肯輕易鎚去今則全宅皆燬於火矣

軍機堂上鐵丸飛禁禦沈沈晝掩扉多病可憐樞密使白頭留值不能歸。

交民巷開仗時槍彈飛入軍機堂上舊例軍機大臣晨入午散自軍事緊急各大臣輪流值宿時某中堂適抱河魚之疾偃卧禁中形容頗悴

乞選漁船鑽鐵甲議挑井水灌城濠料渠謀國憂勤日異想天開首獨搔。

中州李侍御奏請挑選海戶潛伏水底鑿沈鉄甲船崇尚書奏請挖深京師城濠運水灌注以阻敵人

沙場裹革此身輕枉鍊前軍三十營死敵死民同一死可憐到底未分明。

直隸提督聶軍門士成統武衛前軍三十營奉旨剿團為國民所痛恨六月十三日在天津與洋人開仗力竭陣亡全軍潰散或曰為國民所戕害也

臚唱曾傳第一聲黔南冠冕擅才名募苗也作勤王計弱冠終軍自請纓。

夏殿撰同龢奏請自備資斧歸募苗民率赴前敵詔允之

文士終輸市會姦無端因服辱清班多財更比多才惠日下何人救對山。

六月初八日團民持莊郎手諭立捉黃慎之學士到府幽閉數月遂送詔獄聞其起事之由緣學士于京中開設三肆平時精于出納頗結怨于小人值此兵亂充斥其掌櫃人等意欲乾沒致遭此禍

銀刀簇擁大司徒複壁藏人事有無大獄全憑神語定豈知神語總模糊。

喧傳戶部尚書立山家中藏匿洋人莊邸親率團民三次搜查無所得遂
擬該尚書以去令其到壇燒香焚表俄而諸神下降歷數其罪尚書形色倉
皇未能分辨莊邸奏交刑部監禁

貴介匆匆走急裝身懷虜使乞援章潞河義士搜衣得一夕喧傳滿帝鄉。

旗人某身藏日本使臣乞援書單騎出走行至通州為本地團民所獲立時
砍殺

巨億償金昔款倭就中漁利善張羅一朝投首邊塵外帶到泉臺有幾多。

六月初七日諭斬廢員張蔭垣于新疆成所因甲午之役張曾經手賠款者
也

津通百里近相望轉運千艘日夜忙糧道忽然無下落朝廷有詔問倉場。

天津被擾江浙糧道及押運委員等四散逃走有旨諭倉場侍郎等查明下
落迅速督運

健兒擁護出京都鶴子梅妻又橘奴都道相公移眷屬原來小事不糊塗。

方事之殷也某相國移眷出京所部官軍沿途護送

選人新自八閩來未謁金門已釀灾飛落彈丸齊洞脇纍然主僕不生回。

閩人某捐納縣丞來京驗看五月二十八日赴部過堂行至前門內忽有彈
丸飛至洞脇而仆僕馬蹶焉

苦行焚修淨六根忽驚明詔下禪門笑渠參透蒲團後也會和南學謝恩。

有詔召山西五台山極樂寺某僧來京蓋出自軍機大臣啟尚書意也

中堂令箭滿街飛武衛軍中脫號衣只要錢財不要命馬馱車載幾羣歸
五月二十六日武衛軍四出搶掠榮相親持令箭拏獲三十餘人當場正法

華俄西去滙豐存雪白紋銀百萬屯想發洋財人似蟻崇文門接正陽門
華俄道勝銀行被毀其時滙豐尚存屯銀甚多都中無賴人人想發洋財矣

第宅連雲美奐輪貴官氣象邁羣倫不圖暴客垂涎久白晝揮刀不避人
徐中堂孫中堂曾襲侯等宅同日被劫一空

故家篋笥秘奇珍發視無端墮劫塵翡翠朝珠貂膝褂賣來不值幾多銀
諸宅被劫後均于前門外消贖有以京蚨三十千得帶膝貂褂者有以京平銀四五兩得翡翠朝珠者

戶部衙門積蓄多甘軍大隊作巢窠堂司官屬紛紛散銀庫郎中沒奈何
戶部衙門為董軍所駐辦事人員均遷至會典館內

宮殿巍巍畫裏開洛陽王氣鬱佳哉而今不似東周樣少箇元公劃策來
春間軍機處接到豫撫裕長摺件內有精繪洛陽宮殿圖一紙

旂分八面下秦州推背圖中一語留紺宇琳宮清淨地大興土木待巡遊
聞陝撫在省城豫修一大寺院土木丹青極為華麗以備西巡之用

輓粟飛芻絡繹過神倉玉粒積多多如何直待兵爭歲始發緡錢治運河
朝旨命漕運總督江蘇山東兩巡撫濬治運河以利轉運

稅司教習聘歐西廿載勤勞未可訖一自紅羊同墮劫冤禽夜夜上林啼

總稅務司赫德大學堂總教習丁建良為中國辦事三十餘年素稱得力皆授有二品官階今則同困城中

宏規大起育英才學貫中西馬帳開筵吹一聲絃誦歌諸生雲散講堂裁

京師大學堂經營三載規模初具經費若干萬均存道勝銀行自該行被燬此款化為烏有管學堂大臣遂有裁撤學堂之請

揆文奮武兩難兼郡國新停舉孝廉多少星軺馳驛路邯鄲枕上夢初甜
六月十二日詔停今年鄉試緩至明年三月舉行典試一律召回

曹部郎官散若雲誰將案牘理紛紛漫云請假循常例嚴旨全教予處分

京城開戰各部院司官紛紛回籍諭分別請假未請假一律嚴予處分

紙人豆馬舞漫天又見林清閨白蓮六十餘人齊就縛一朝駢首禁城邊

步軍統領等獲白蓮教匪六十餘起出紙人一箱黑豆數斗審明後均押赴菜市口正法

交民兩字改雞鳴共說今名勝舊名試把六書參體例居然轉註與諧聲

國衆改交民巷為雞鳴街因推背圖中有金雞啼後鬼生愁一語也

大柵欄前熱鬧場。無端一炬燼咸陽。問渠閉火多奇術。為底神靈誤主張。

五月二十日國民焚大柵欄老德記藥房霎時全街俱燼延及觀音寺街煤市街廊房頭條胡同二條三條胡同西河沿珠寶市東西荷包巷灼及正陽門城樓計焚二千餘家相傳團眾有閉火之術至此獨不靈驗

祝融虐斂上千霄。金店銀爐一例燒。百萬商民齊束手。市塵景象太蕭條。

大柵欄之火金店爐房盡燬京中銀源頤竭銀號錢鋪典肆一律停閉市面蕭條為從來所未有

深宮不忍苦吾民。百萬新頒內帑銀。傳諭四恒齊復業。大家借給要均勻。

六月初九日發內帑銀五十萬兩戶部銀五十萬兩借給四大恒銀號令其規復舊業以維市面四大恒者恒和恒利恒源恒裕都中錢肆巨擘也

發棠乞請允羣臣。紅票源源指百因。門榜大書平糶局。禁城內外潞河濱。

兵亂之後飢民載道順天府請發倉米萬石于京城內外及通州一帶設局平糶

輝煌金碧店懸牌。洋字洋名一律揩。歐墨新書千百種。滿投溝井自沈埋。

國民欲日燬都中諱言洋字店肆招牌一律改換如洋布改作粗布洋藥改土藥之類西國書籍皆于夜深人靜時暗中拋棄溝井皆滿

置閏羲和始帝堯。春秋冬夏四時調。如何八月成妖孽。人與黃楊兀共遭。

相傳閏八月必不利于國家今又驗矣均莫測其所以然之故

家家寒食問何為。一紙紛傳禁火期。七夕中秋與重九。古來幾個介之推。